



Jens-Frederik Nielsen
Inatsisartunut ilaasortaq
Demokraatit

Illunut sanaqataaffiusunut taarsigassarsiat pillugit Inatsisartut inatsisaat nr. 28, 3. december 2018-imeersoq pillugu § 37 naapertorlugu apeqquteqaammut 2021-149-mut akissut

19-11-2021
Suliaq nr.: 2021 - 19563
Id. nr. 70221061

Asasara Jens-Frederik Nielsen, Demokraatit

Inatsisartut suleriaasianni § 37 naapertorlugu Illunut sanaqataaffiusunut taarsigassarsiat pillugit Inatsisartut inatsisaat nr. 28, 3. december 2018-imeersup atorneqartarnera pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1 – Sanaqateqarluni illulianut taarsigassarsiniarneq pillugu Inatsisartut inatsisaat nr. 28, 3. december 2018-imeersup allanngortinnissaa Naalakkersuisut pilersaarutigaat?

a. Taamaappat suut?

Akissut: Illunut sanaqataaffiusunut taarsigassarsiat pillugit Inatsisartut inatsisaat nr. 28, 3. december 2018-imeersoq allanngortissallugu Naalakkersuisut massakkut pilersaaruteqanngillat. Suliaqarfik tamanna 2017-imi januaarip aallaqqaataani kommuninut tunniunneqarpoq, tunniunneqarneralu ilutigalugu siunertamut aningaasat immikkoortinneqartut aamma tunniunneqarlutik.

2019-imi januaarip aallaqqaataani inatsisip atuutilerneratigut, Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi kapitali 5 tassuunakkut taarserneqarpoq, tassungalugu atatillugu aaqqiissutip isumagineqarnera Namminersorlutik Oqartussanit kommuninut pisortatigoortumik tunniunneqarluni.

Taamaakkaluortoq suliaqassanik kommuninut tunniussinissamik Naalakkersuisut tullerijarinerinut atatillugu, aaqqiineq 2017-imi januaarip aallaqqaataani aatsaat tunniunneqarpoq. 2017-imumut Aningaasanut Inatsimmi konto pingaarnermi 87.72.22 "Nunaqarfinni isorliunerusunilu inissialiortiternermut pilersaarut"-mut aningaasaliissutit 2017-imi januaarip aallaqqaataani kommuninut tunniunneqassasut, ataatsimoortumik tapiissutit pillugit 2017-imi isumaqatigiissummi isumaqatigiissutigineqarnera malillugu tamanna pivoq. Taamaattumik siunertamut aningaasat immikkoortinneqartut kommuninut tunniunneqarput.

Sanaqateqarluni illuliornissaq 1953-imiilli periarfissaanikuuvoq. 2018 sioqqullugu qinnuteqartut piukkunnaateqartut arlaqarsimanngimmata, inatsimmi nutaami 2018-imeersumi arlalitsigut sakkukillisaasoqarpoq. Sanaqateqarluni illuliornissamut taarsigassarsiaritinneqartut siornatigut ukiut 33-t ingerlaneri nalikillilerneqartarsimasut, ukiut 20-t ingerlanerini nalikillilerneqartalerat allannguutit annersaat ilagaat. Tamatuma saniatigut aaqqiinikkut nunaqarfiit, illoqarfiillu minnerit siunnerfigineqarput,

tamatumalu kingunerisaanik illoqarfinni annerni Ilulissani, Aasianni, Sisimiuni, Nuummi Qaortumilu taarsigassiisoqarneq ajorluni.

Taamaakkaluartoq ukiut ingerlanerini tapeeriaatsit atuussimasut Naalakkersuisut 2022-mi nalilersussavaat, ineqarnermullu immikkoortumut tunngasut pillugit eqqartuinissani aggersuni siumut isigisumik periarfissat nalilersussallugit. Oqaloqatigiinnermi kommunit peqataatinneqassapput.

Apeqqu 2 – Naalakkersuisut qinnuigineqarput paasiuminartumik skiimalioqqullugit, ukiut kingulliit tallimat sanaqateqarluni illulionernut taarsigassarsianik qanoq annertutigisunik taarsigassarsiisoqarsimanersoq. Skiima inoqarfimmiit inoqarfimmut immikkoortiterneqarsimassaaq.

a. Taakku kisitsit aallaavigalugit Naalakkersuisut isumaqarpat, inatsit siunertaatut sunnuteqartoq?

Akissut: Apeqqu 1-imut akissut innersuussutigalugu, suliaqarfik 2017-imi januaarip aallaqqaataani kommuninut tunniunneqarpoq. Sanaqateqarluni illulianut taarsigassarsiaritinneqartut pillugit Namminersorlutik Oqartussat kommuninit ukiumoortumik ilisimatinneqarneq ajorput. Taamaattumik 2016-ip qiteqqunneranit suliaqarfimmiit kommunit tigusinissaasa tungaanut pisimasut kisimik paasissutissiissutigineqarsinnaapput. Sanaqateqarluni illulionissamat suliaqarfiup 2017-imi januaarip aallaqqaataani kommuninut tunniunneqarnissaa sioqqullugu, allaffissornikkut suliasat Namminersorlutik Oqartussat A/S Inissiaatileqatigiiffik INI-mut isumagitinnikuuai. Taamaattumik paasissutissat A/S Inissiaatileqatigiiffik INI-mut piniarneqarnikuupput.

Taamaattumik INI A/S-ip suliasamik piffissami isumaginninnerani kisitsisit pigisai, eqitsimmi tulluuttumi aallaavigineqarput.

Sanaqateqarluni illulianut 2016-imi taarsigassarsiaritit		
Inoqarfik	Qinnuteqaatit akuersissutigineqartut amerlassusaat	Taarsigassarsiat atsiorneqarnerminni angissusiat
Uummannaq	1	1.320.136,80 kr.
Saattut	1	1.497.162,30 kr.
Katillugit	2	2.817.299,10 kr.

- a) Nunaqarfinni, illoqarfinnilu minnerni innuttaasut inissianik attartortittakkanik isumalluutaarullutik, inissianik imminnut pilersorsinnaanissaannik periarfissinneqarnissaat aaqqiinikkut siunertarineqarpoq. Aaqqiinerup kommuninut tunniunneqarneranut atatillugu, sanaqateqarluni illulionissamat aningaasat immikkoortinneqartut allannortinneqanngillat. Sanaqateqarluni illulionernut atorineqarnissaat siunertaralugu, ataatsimoortumik tapiissutit aqutitigalugit kommunit 2017-imit 2020 tikillugu 105 mio. koruunit missaannik aningaasaliiffigineqarput. Sanaqateqarluni illulionernut aningaasat atorineqartut kommunit nalunaarusiaraat, ataatsimullu atorineqarsimasut 46,5 millioner koruunit missaanniillutik. Tamatuma saniatigut aningaasat atorineqarsimannigitsut, Nuugaatsiami Illorsuarnilu tassaarsuaqarneranut atatillugu 14,7 mio. koruunit missaanniittut immikkut ittumik atorineqarput. Ataatsimut isigalugu 59,2 mio. koruunit missaanniittut atorineqanngillat, assigiinnarpaa piffissami sanaatorneqarsimasinnaallutik agguaqatigiissillugu 1,7 mio. koruunit nalinganut kommunit illuliarisinnaasaat 34-t (Ilanngussaq 1). Tamanna tunngavigalugu Naalakkersuisut isummerput, aningaasaliissutigineqartut aallaavigalugit naatsorsuutigisatut aaqqiineq atorineqarsimannigitsooq. Naalakkersuinikkut Ataqqatigiissaarisooqatigiit

ataatsimiinnissaanni, aaqqiinermi periarfissat kommunit peqatigalugit Naalakkersuisut misissussavaat.

Apeqqu 3 – Innutaasut qassit sanaqateqarluni illulianut taarsigassarsiniarsimappat itigartitaallutillu? Itigartitsissutit skii mangorlugit inoqarfimmiit inoqarfimmut immikkoortiterneqarsimassapput itigartitsinermullu tunngaviusoq allassimassalluni.

Akissut: Paasissutissat A/S Inissiatileqatigiiffik INI-mut piniarneqarput. INI A/S-ip paasissutissiisutigaa, sanaqateqarluni illuliornissamut qinnuteqaatinik suliaqartarneq 2016-ip qiteqqunnerani tigusimallugu, 2017-imilu januaarip aallaqqaataani suliaqarfimmik kommunit inaarutaasumik tigusisimasut.

Taamaattumik INI A/S-ip suliassamik piffissami isumaginninnerani kisitsisit pigisai, eqitsimmi tulluuttumi aallaavigineqarput.

Sanaqateqarluni illuliornissamut taarsigassarsitinneqarnissamik 2016-imi qinnuteqaatit itigartitsissutigineqartut amerlassusaat		
Inoqarfik	Itigartitsissutigineqartut	Itigartitsissutigineqarnerinut patsisaasut
Nanortalik	3	Najugaqarnermut uppernarsaatip nassiunneqarsimanginnera, sulisartumit neqerooruteqartitsisimanginneq, namminerlu akiliutissat akilerneqarsimanginnerat.
Aappilattoq	2	Najugaqarnermut uppernarsaatip nassiunneqarsimanginnera, sulisartumit neqerooruteqartitsisimanginneq, namminerlu akiliutissat akilerneqarsimanginnerat.
Atammik	3	Najugaqarnermut uppernarsaatip nassiunneqarsimanginnera, sulisartunit tamanit neqerooruteqartitsisimanginneq, namminerlu akiliutissat akilerneqarsimanginnerat.
Iginniarfik	1	Najugaqarnermut uppernarsaat amigaatigineqarpoq, sulisartunit neqerooruteqartitsineq amigaatigineqarpoq, namminerlu akiliutissat akilerneqaratik.
Saattut	1	Patsisaasoq allassimangilaq
Tasiusaq-Nutaarmiut	1	Ruujorilerisut neqeroorutaat nassiunneqarsimangilaq, namminerlu akiliutissat akilerneqaratik.
Qaanaq	1	Najugaqarnermut uppernarsaatip nassiunneqarsimanginnera, nunaminertamik atugassinneqarnissamik akuersissutip amigaatigineqarnera, sulisartumit neqerooruteqartitsisimanginneq, namminerlu akiliutissat akilerneqarsimanginnerat.
Katillugit	12	

- a) Paasissutissat 2016- imeersuupput, taamaattumillu Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqusstaat nr. 11, 19. november 2007-imeersoq atuussimasoq tunuliaqutigineqarluni. Siuliani eqitsisini paasissutissat naapertorlugit matumani ilassutitut oqaatigineqassaaq, qinnuteqartunit 14-iusunit marluinnaat akuerineqarnissaat siunertaasimangimmat.

2017-imi januaarip aallaqqaataanit manna tikillugu qassit itigartinneqarsimanersut, sunalu patsisigalugu itigartinneqarsimanersut Naalakkersuisut ilisimanngilaat.

Apeqqu 4 – Naalakkersuisut suliamut soqutiginaatilinnik allanik paasissutissiisinnaappat?

Akissut: Suliamut tunngatillugu soqutiginaatilinnik allanik Naalakkersuisut paasissutissiissutissaqanngillat.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga


Naaja H. Nathanielsen

./. Ilanngussaq 1: Naalakkersuisut isummernissaannut tunngavigisaq: Aningaasat kommuninut nutaat – inissianut aningaasalersuisarnermut aaqqissuussinerit assigiinngitsut